

水田亭碑記

在廉郡古城為郡守張岳立

明邑人包易知縣

廉為粵東邊郡瀕海負山層巒疊嶂故高阜之地多而原隰之地少一遇旱暵鮮克有秋民多艱食前茲守令以遷徙去代靡常無暇經理嘉靖乙未郡伯惠安張公以名進士初任行人以建言請官後由授舉遷知廉州府事首詢民瘼以水利為己任乃躬詣高亢若多惟若五六若陳調若木水若大浪咸徧歷焉乃命民曰序乃錢鑄其併力合作無稍後以是疏築深淪咸授以法每田一成則於江之可障者上下築堤廣三丈袤一十八丈高如廣之半俾水泉由溝以達之遂自遂以達之畝且周視地形水勢之高下而經營導引之次第畢舉期月而告成壩塍堅厚水圳旁達昔為亢區今為原隰如此類者不下數十處厥功大矣斯民憚無以昭示來茲爰於水田之畔造亭暨碑以志遺愛而囑余為記余不文因就農夫野老所口述而執筆記之如此

重修廉郡東山寺記

明石康魏紹文

廉郡東山寺距城里許蓋宋寶山成禪師所創者也至國朝永樂十年僧珏淨重修之而僧綱司爰置於斯焉舊寺名雖存其堂殿宇廊廡皆缺佛像黜聖亦鮮莊嚴至永樂十一年有釋普聰者拜市化緣居民士校爭施錢幣於是重建佛殿伽藍祠列祖中庖福山門耳且塑造三世佛暨觀音菩薩漢天王列祖諸像丹碧華飾燦然一新寺前鑿池蓄水寺後植竹菽蔬監丞御史周叔造按部駐節為篆江角第一峯五字揭於楹進士喻俊為書東山寺牌額誠廉郡一清淨莊嚴地也嗚呼佛者夷狄之一法自古儒者所不道然予以為好為佛事者眾亦足以規國家氣運之隆而見世道人心之盛蓋世之布施不吝者固動於因果禍福之說然非承平久物阜豐則家未給而人未足奚暇合現在之資博未來之福耶且佛氏之因果禍福即吾儒所言迥吉逆凶降祥降殃也彼愚不肖者流悍然不信非真能天惑也直無忌憚耳今廉之人士比戶充盈樂施不倦語之以因果禍福無弗信者不謀見國家氣運之隆世道人心之盛歟至若珏淨普聰身為佛徒即實心向佛是亦顧名思義循分盡職者僧且有是則廉之申若紳若士又當何如耶昔人謂觀泓陽園囿之盛可規天下治平予於此寺亦然故因首事之請而樂為之記

又

郡丞
張輔

自東漢明帝以來佛法振興所莫不崇建寺廟奠妥聲靈凡以迎明神之孚佑而壯勝地之觀瞻也我康東郊有東山寺距郡城一里許蓋南越昌符中靈覺寺之故址而創始於宋寶山成禪師者也有明永樂萬歷間嘗兩修之輪奐聿光堂構大備閱今未百年值烽火頻仍殿宇廊廡稍棟垣骨傾欹摧裂即佛像亦漸以黜堊剝蝕歲癸亥余偶游觀及之慨然以修復為己任會有識獄繪圖視師行營署蒙春州日從事於奔走有志未逮每念廟貌傾頽之狀難再姑待請於太守佟公亟同商確捐貲先倡一時官紳士庶旅客商廛皆隨力樂施寺僧行習以梵刹清修住持有年相為成議諏吉鳩工重新正殿及前之天王殿且募塑裝造範金嚴嚴雖云重修不啻締造計以丙寅之春經始以丁卯之秋告成共費錢六十萬有奇僧行習合十徵記期垂不朽予維天下事皆狃於因循而成於奮作倘承積久頽敝之後畏難苟安不革故而鼎新之將來益不能支予之初謀是役也人多咋舌低眉以為工力浩大貲費鉅繁一似力之不能赴願者惟佟公與予毅然舉行事不辭乎極難功已成乎大壯今甫期年向之傾欹剝蝕城矣摧裂者渾堅矣黜堊剝蝕者璀璨整齊矣成迹依然規模有加雖法力宏通衆心協助亦佟公與予之拮据謀始不奪於浮議而相與有成也從此而明神之孚佑赫濯無窮勝蹟之留貽觀瞻並壯皆自今日之落成始矣然則天下事其可安於因循而不力為奮作乎佟公聞余言而建之命僧行習鐫之於石然寺固其小焉者也

重修府城隍廟碑記

陶洽

率稽祀典凡庇民水旱疾疫者則祭之預國封爵晉秩者則象之所以用明通幽也則今之廟制得與郡邑並設兼重者豈非城隍哉蓋一部也明有人民則郡刺史主之幽有鬼厲則郡城隍主之其體等相敵也厲或憑依於人法不能加刺史牒諸神使驅磔之乃不敢為崇強悍或武斷於鄉神奪其算假手於刺史使桎梏之然後知畏法其權等相衡也此猶以執事言之至若神不庇民災民訴於刺史刺史具文告於神刺史墨貨而忘民瘼神亦不直刺史是神恩刺史之責而勇於去害作福利史憚神之昭

屬勉以修己爲善此其義又相與有成也城隍之於一郡顧不重哉按大慶爲魯東極邊星分異軫屬禹貢荊州之外地夷壤交錯山海迴環明洪武元年置爲府二年太守脫公因重建城隍廟於府治東其先及元宋而上則均不可致嘉靖中郡守詹公瑩駿公岳次第修之國朝康熙四年郡守陳公良玉五十九年郡守徐公成棟皆繼而修之迄今凡幾十年矣洽奉命觀察是邦歲庚辰上官委攝高廉道篆春三月分巡之歙州過慶郡謁神廟見少庶棟宇日就傾圮神像遺於民舍幾不蔽風雨爲心動者良久思嗣而葺之然任其責者宜望之刺史圖聞汀李公際隆守土若有待洽低回圖不思去明歲辛巳夏李公坐事罷洽以攝篆至撫治之三日齋沐詣神忽有觸於昔之願不敢以庖代而諉諸後人於是卜吉庀材鳩工割清俸爲之倡復言於同官司馬霍公裕諫使爲和入皆踴躍恐後計堂之規制仍古而不改易傾者圮者起之墜之儼即之像昭式恐也增神胥隸肅從衛也開與公門任游衍也更廓其後建堂三楹爲燕宇所以妥靈社也洽敬臨而觀之載拜而禱之思古者刺史甫入境必告神月旦必詣神歲則以牲醴奉諸神重神若此神豈不爲民福然書云黍稷非馨明德維馨則刺史惟有勉於爲善廉潔惠裕先以馨神神其聽之庇民水旱疾疫錫民仁壽豐年以醫刺史若所謂體相敵權相衡義相成者正以德相警若古者刺史用明通幽也後之來者可以知祀神之有本矣斯是廟也事始於七月朔日丁酉竣於九月旬有二日戊申也謹記而壽諸石

募修斗杓閣引言

合浦楊 祀
知縣

郡城之有斗杓閣也創建於田司馬將以正頽風而立標的閣供玉帝翼以二斗使人知心性源流也以文昌武曲使人知崇正黜邪避俗詭鬼而媚神遇災祥禱禱角諛諱達旦彼亦不知所敬者何神所祀者何鬼特聽命巫師耳至以斗杓名閣而語之曰爾媚鬼神不知禳星斗舍昭昭而索之冥冥矣第閣成於乙卯歲今未及一紀屢遭颶風似欲摧裂於是諸生吳秉極專廷相石子璋邱爲高諱忠言劉振球邱應選以閣祀議院之右朔望瞻拜頻加慶額非所以導迎善氣也爰謀之學博霍陳兩君重加修葺閣之形家曰是閣也恰抱府署龍砂之左所以鎮海門者此閣亦大有關係余亦信是說之非誕計所費當百餘緡

未嘗妄干禮越乃搏節清俸以成之紳士之樂助者聽不數月而金碧輝煌陳鼓鐘磬幡幢矣老泉曰用力少而成功多其是之謂乎因爲序以告來茲庶有嗣而修之者而此閣可以不廢

生生閣碑記

楊祖

帝出乎震萬物所從生也東嶽廟之建義取於斯慶郡之有東嶽廟前賢開基定址更有深意謂青陽固爲資生之始然有生者有所以生之亦其權統體於乾元其氣潛滋於地脈者郡丞翁朝於大廩山迤邐曲折盡屬平岡少起伏奇拔之景奉到頭還須護峽東山寺屹然左峙設無東嶽一廟擁於右則過脈單寒會浦父老爲余說如此繼而住持自覺和尚以江右名士淵跡縉流南游嶺表一日飛錫駐此俯仰山川之勝毅然以開山爲己任曰此處尚少培植吾當成之亦功果事蓋指東嶽廟爲郡城護峽之古刹而廟說湫隘未得在巍大廩主星莫能仰應故也一時士民走相告成以僧言若合符節憶余自束髮受書每遇仙佛之蹟靈輿之區恆略而不言第士大夫爲整頓地方起見固宜有用衆而不用獨者因思郡基來龍平緩不得茲廟以護右峽則柔弱不振而無日奮其發生之機欲斯康阜民物振起文風難矣余因曰僧言其足徵哉於是遠近檀越施主咸來樂助建閣三楹齋堂僧舍畢備燦然名聞若矣起工於康熙甲子四月落成於乙丑四月信是佛法仙靈之有裨於山川也哉余喜其工之成以愜士民之願亦起敬扶衰之一大楹括也用勒諸貞珉以彰不朽

重修三官樓記

清和修國勳

三官卽三元也三元之說自漢世言讖緯術數者始而邵子元會運世因之蓋以天地之初第一甲子爲上元其次爲中其次爲下下畢而上復至矣末俗道流附會其說因謂天地水三官之神會治上中下三元之世而三官之廟貌遂徧天下焉廉城西隅有建樓以祀斯神者其樓聳然高峙雄鎮一方不知創自何代何人予初蒞郡巡歷及之喜其與城相逼足以代謀樓壯形勢且藉神道以設教則施捨修葺者衆可不至於傾圮謹昔人良法美意也第歷年已久臺榭榱桷已岌岌有不可終日之勢因謀所

以修之而里之者老主形容言成謂年向不吉余曰謀不僉同未可舉也議遂止迨甲子春士民僭住持僧始資募修余倡捐薄俸諸同事孱然和之閱數月落成一時輪奐之盛登之者咸知余爲真足代謀樓壯形勢而聊藉神道一設教也雖然余猶有進焉者夫三官三元雖不見經傳然天神地祇暨元冥司水之神固古人所敬祀且廉地距中國萬里僻處天涯海角之區其氣化所歎水土所困尤賴神明默運潛移以輔政化所未至然則斯樓之設何必意專在神又何必意不在神也若夫三元之理或是或非三官之司爲無爲有是則非余所及知請還質諸言術言道者昔康熙二十三年十月之吉

重修藥王廟碑記

周碩勳

周禮疾醫瘍醫五藥月令孟夏蓄聚百藥蓋統而言之曰五藥百藥折而論之則玉札丹砂赤箭青芝藥也粟米蔬果魚肉亦藥也等而下之牛溲馬勃敗鼓之皮亦藥也盈天下皆物卽盈天下皆藥惟藥王能辨其氣味別其名彙醫攻補寒熱之性協君臣佐使之義各適其炮製修合之宜而臚諸本草載在方書俾天下後世得以消陰陽珍戾之災却疾疫疢癘之患其爲德至渥其爲功甚大也廟而祀之以崇古制而迓神庥詎不宜哉廉俗信巫不信醫凡有疾病輒聽巫覡之蠱惑而置醫藥於勿問夫設局療疾煩王政之經營而邪術師巫干功令之明禁其孰是孰非必有能辨之者卒奈何昧顯而易見之理藐威而遂通之神置施之切當投無弗效之藥而徒假假焉委命於荒誕不經之巫覡嗚呼亦見其惑之甚也已余守廉五年愧無以挽頹俗茲量移蒙郡去喜藥王廟修葺竣首事者請紀其略以勒諸石爰書此以畀之聊以寓崇正黜邪之思而爲廉郡之風俗人心破愚蒙而醒迷惑也云爾

真君廟碑記

張育(十旁)春

郡城鼓樓橋頭許真君廟河帥康公茂園守廉時創建嗣署合浦令劉芳檄而新之增撥官田若干畝入廟道光七年丁亥予奉命來守是邦紳士來告曰神之福我三廉也由來久矣廟經再易而規制未宏觀察何公緩齋守廉時議改建旋遷秩去以制錢

二百貫歸廟生息今積錢若干捐輸以益之可以集事余遵其言以百金畀之台郡官民及江右人之慕游於斯者各出金勸事計舊積及新捐得銀若干兩撤材平地並填築池基共得地十五丈有奇建新廟一座二進正座之下爲捲棚列屏門以蔽之屏之外爲前楹東爲天花宮首臨大池一水澄清面城垣如環帶望海上蓬萊諸島出沒隱見氣象萬千廉城第一勝境也廟成諸紳屬予記之昔先師分宜進士林平園先生採豫章十代文獻略晉書吳猛傳列仙錄等書作真君事略近二千言記載其詳謹按真君姓許氏諱遜字敬之生時母夫人何氏夢金鳳銜珠墜掌中七歲而孤事母至孝師事吳猛猛居官有異政以孝行著聞晉史稱其幼時侍母側手不驅蚊懼其去己而噬親也真君之以忠孝成神實淵源於此舉孝廉不就太康元年晉平吳始仕爲蜀郡旌陽令開諭善導大施利濟民戴之如慈父母政成歸隱於時海昏有巨蟒噬氣喻人吞噬甚衆仗劍斬蟒又追殲蛟孽於長沙以豫章多水患慮爲蛟辰(虫旁)所穴因於牙城南并鑄鐵柱下施八索鉤鎖地脈至今古蹟猶新旋周行大江南北發宏願力殄患濟人足跡滿天下昭帝大甯初王敦作亂真君偕郭璞往止之敦不聽更殺郭璞先是真君得謔母寶書道行已成遂卽座間隱身去從軍征姚襄襄必西北走議邀擊之時桓温爲帥言不見用真君知温隱蓄異志遂去之以孝武甯康二年八月朔日舉家拔宅仙去距生凡一百三十六歲所著有勸戒遺詩及靈劍子書行世其大略如此宋王荆公安石旌陽祠記稱真君居官有大功德於民後治水除蛟患著奇績功在萬世皆其精誠所感格其德慧智術又足以濟之魏季子禮稱真君設七靖小鎮安民害其用極神然其所學之道則惟及於忠孝故能貫天地古今而成神化臨海黃進士河清著真君祠記略云讀真君遺書牖民覺世大旨歸於忠孝前人之論列如此國朝以禱雨奇應封妙濟真君欽頒祀典列入正祀有司以時祭享竊惟真君本忠孝成神靈昭顯著隨在感通自晉唐迄今尸祝徧寰宇非天下之至神其孰能與於此廉人士景仰前賢必勉爲孝子忠臣敦善行不怠各錫潔其心志相與入廟告虔神之錫福於茲土也豈有艾與

惠澤龍神廟碑記

余以道光丁亥夏五月欽奉簡命來守是邦至之日甘霖大沛荷蒙新太守旌旂夾道而觀者咸欣欣然有喜色合浦令馮公勉齋來告曰郡自二月不雨至於是月三苦亢旱亟矣訪古蹟出城東十餘里得於惠澤龍神祠額爲民請命見廟前古井剝莽掩塞略一疏通隨有清泉湧出汲歸奉法壇作供雷聲殷殷然起於海隅微雲漸興四野涼風拂拂越數日而雨澤降神之響應如此考郡志前明宏治十八年三歲大旱太守周公夔閱一統志郡治東有惠澤廟祀海龍神迺率僚屬齋沐禱之三日得大雨遂新其廟歲久傾圮前郡守何公天衢擬撤而新之方鳩工庀材而何公遷山東觀察去越今十餘年弗觀厥成邑士大夫及里民之賢者咸願踵與斯舉以奉答神庥余聞而嘉歎曰噫異哉龍之爲靈昭昭也其廟食於茲宜矣余聞陽愆陰伏水旱災沴之患感世不能無長民者見災知懼修德以禳之於是乎人和而神降之福其或吏不修職民弗軌於道雖一禮祀神其享之乎今馮公能聿修厥德以和於民鄉士大夫亦好行其德禮教信義之風盛於序序而暨乎閭閻所謂明德維馨者於是乎在因而崇祠廟肅觀瞻以祈甘雨以穀我士女神之錫福於茲土也豈有艾歟抑予聞神之靈上應蒼龍之宿春分而登天力能興致雲雨參贊天地化育於彼於此無在無不在今廉州瀕臨大海神靈歸宿之區爲之立廟崇祀如赤子之孔邇父母誠至斯通道長民者興化設治至誠足以感神則神之廟食於斯其昭明鑑格必有捷如影響出於言思擬議之外者是歲大有年馮公集紳士於庭相與慶民力之普存設冊釀金就舊基作新廟濬廟前古井環以垣董是役者咸恪恭將事三閱月而告成其地高明爽塏其規模宏敞壯麗凡筵豆蓬爐鼎之屬俱新之稱美備焉落成時諸紳士鑿石屬予記爲書其始末敬撰侑神樂歌一章鐫諸石使後之官斯土者咸有感於斯文首事銜名捐輸姓字另石以紀歌曰維強圉兮建歲額靈爽兮降康昭顯應兮須臾施需澤兮汪洋崇靈宇兮輪奐肅禮祀兮冠裳享明德兮錫潔薦黍稷兮馨香神之格思兮不可度神之錫福兮不可量自今以始兮歲其有穀我士女兮綏我海疆

重修沙岡墟義農廟碑記

字山草
重文編

林朱贊

原州古穠犢雜其人尚鬼自漢族移植日多遺俗猶存所祀鬼神陰載祀典者外餘多淫昏不可究詰沙岡墟之有義農廟洵
復絕也義農爲上古首出之神聖教民佃漁教民稼穡天下萬世飲食其德雖徧祝馨香不爲濫乃環視諸郡罕聞廟祀而服如
康慶如沙岡獨巋然有廟甯非大異以是見鄉人士知所奉務而脫除詭惑淫昏之俗久矣攷斯廟所肇興由元年得雨鄉人王
君國儒等首創建景時則嘉慶癸酉也自是羣成國之道光庚子王君建邦始墾墾平嶺牧地用作時祀費厥後一修於咸豐
己未再修於光緒丁丑皆緒有增加規模屢拓迄今又三四十餘年矣蟻蠶繁侵風雨乘隙見者感愴紳何以安鄉中諸君子集議
將前墾牧地按畝捐貲人皆踴躍於是鳩工庀材閱兩月而蕪事諸君之功偉矣以視前人之創始墾修者抑何多讓雖然竊有
進焉我中華以農立國義農登其端後人不可不恢其緒願自二十年來農利衰耗日形退步而後起之歐美諸國反駕而加之
由治其業者安常蹈故學理之不講使然也今諸君崇祀義農重新廟貌誠能奉其神而遂以求其學操其業而更以研其理
使種植日新物產益富爲我國農業家吐氣是卽義農之功臣神而有知其愉快當何如豈第默庇一方而雨暘時若已哉諸君留
意焉則斯廟之修益不負矣

蘇公遺蹟記

康基田

余治康之明年開疏城河宜洩城內池塘積水於城東隅得東坡古井去井百弓有池百餘畝碧水清冷遊魚瀟瀟中有二洲立
亭於上曰東坡里八云此東坡當年結廬處也老郡志宋元符三年文忠自 移康所居有清樂軒長春亭擅園池竹木之勝與
康左巖及劉仲幾諸人嘯詠其中今之亭與井是耶非耶欲問其處而風流歇絕荒煙蔓草尋訪無由蓋勝蹟之湮沒久矣願念
公所居不可漸滅迺鳩工庀材採之度之不三旬而告成臨其軒廓然面清迥登其亭翼然而高明樹色波光掩映於簾櫺几席
間爲一郡勝概昔韓文公謫守潮陽潮人愛之名其山曰韓山江曰韓江用誌不諠康人以東坡名其亭與井愛公猶是也然夷
考其時公之折辱亦甚矣始以降謫安置惠州居二年惠人從游者衆營居白鶴觀當事聞而惡之益屏置瓊州極至僂耳非人

所居之地有司猶以就人旁官屋爲不可依棲光(木旁)柳樹下置地築屋僱人運甃畚土助之始得安居自古賢人君子不遇於時困頓抑鬱未有如此之甚者迨量移至慶旋復徙永計公居廉爲時未久顧何以得此於廉人也廉人思公慕公積至數百年之久名其亭與井以爲榮入人之深有如此也蓋天地之正氣不容息滅天理之在人心無間歲時文忠立朝大節零謬不回一以結人心厚風俗爲主天下之人想望丰采洎出典方州明習吏事凡所施設悉與民宜至於竄逐遐荒轉徙靡定蹙之愈窮處之彌泰泊然無所芥蒂所至無問賢愚咸奔走而慕樂之豈以居游之可暫移易其心哉廉之其與井直與惠之白鶴觀僖光(木旁)柳菴同一著美山水亦爲生色也史稱公遺簪(人旁)居廉惟幼子過隨侍著書爲樂時從其父老游若將終身此亦足以見公之心而廉人愛公深而且久如韓山韓水之傳於無窮者其來有自爲文以勒諸石

重修蘇文忠公遺蹟記

知許 鉞

慶州介兩粵之交濱海爲郡城之東隅有蘇文忠公遺址曰清樂軒長春亭歷年久遠已成邱墟己未歲前任郡守茂園康公捐俸創建壬寅秋余承乏郡篆下車後展謁先賢尋視堂戶又將傾圮爰與同僚商議更新先捐廉俸以爲之倡聞郡紳士皆樂輸恐後閱二月而告成竊念公於宋元符三年自昌化遷於茲以憂患之餘得天真之樂其清風亮節夷險一致嘗自書臨皋亭云白雲左繞清江右洄重門洞開林密公入當時也有思而無所思以受萬物之備觀斯軒也有令人瞻眺徘徊流連向慕不能自己者方今國家承平日久百數十年重熙累洽聲教覃敷民物熙恬漸仁摩義則凡居斯土者攬先民之遺韻企前修而思而瞻遐拜庭除緬想模範以時歌頌聖天子昇平雅化豈不美哉因軒之落成詳其歲月而爲之記乾隆四十八年癸卯四月

孝子祠記

田知張岳

孝子姓鄭名英（音旁）字汝明康郡石康縣海岸圖梁村人也父賜正統初以春秋魁嶺南仕蒼梧訓導母謝氏英（音旁）生而穎異弱冠賦梅月雙清詩出語已驚長老賜卒於官謝氏扶櫬攜英（音旁）兄弟歸里天順壬午流賊起廣西延蔓郡境破石康四出擄人口勒金以贖討亦在所擄中英（音旁）大號哭冒死入賊營給賊曰吾欲丐母命豈敢靳於財願主藏皆吾母手蜀以吾代執釋母歸取何如且吾在母決不忍不來也賊信之釋其母歸實無所有英（音旁）久留賊所已而賊為官軍所追逼移營至遂溪縣拜臺村索金甚亟英（音旁）罵賊愈厲遂遠害其死也無誠與不識皆流涕其後者民沈昱等列孝子死狀請表章之會多事不果嘉靖丙申余行部至永安所距梁村不接得沈昱等狀草其事實信而有徵又讀其詩果警拔梁村元世有故社學一區其後屢興屢廢英（音旁）童時常肄業於其地乃請於巡之陳公大用即其地建祠三楹前為講堂後以祀孝子鄭英（音旁）復為坊額大書烈孝口表之蓋孝子之死於今百年矣一旦發潛德成幽光豈非仁孝通於神明雖事歷百年之久固有曠世而相感者乎乃其奮身詣賊志在全母母得全面身已亡所謂殺身以遇仁者非歟梁村濱海去郡城二百餘里有讀書腐科第者故景仰孝子者倍至表而祠之俾後人知名節之大能以身殉雖窮海之濱世遠年湮終不磨滅其亦可聞風而起矣

合浦縣養濟院碑記

周碩勳

聖王御宇教民以相生相養之道俾各親其親各子其子而天下自無不得所之人然而鰥寡孤獨雖聖世所不能無既無可以相生又孰為之相養正不得不煩在上之人為之一一恤其飢寒籌其安慮俾得各遂其生所以濟天道之窮而補人事之缺也合浦僻在南海為粵東極邊地故前明山海寇亂殘於兵燹幾無甯歲自我朝定鼎休養生息百有餘年承平康阜已登斯民於